

Ina funcziunaria politica tras e tras

Mintga partida dovra in secretari – la pcd grischuna ha Patricia Giger-Capeder

DA CLAUDIA CADRUVI / ANR

■ Patricia Giger-Capeder para da viver per «la partida». Gia ses bab politisava en Surselva. Ses um è er gia s'engaschà en campagnas electorals. Il figl è stà president da la pcd giuvna. Ed ella sezza è dapi otg onns secretaria da la partida grischuna. Entrada è ella avant trenta onns, immediat suenter che las dunnas han obtegnì il dretg da votar. Curt sissur ha ella cumenzà a far politica activa. Betg dispit sin la tribuna politica. Plitost davos ils sumbrivals. Ella è p. ex. stada en la suprastanza chantunala, en quella da Cuira ed en la suprastanza da las dunnas da la pcd svizra.

Famiglia pcd

«La partida è dapertut en nossa chasa», remartga il figl dals Giger's mintgant. La mamma ha drizzà en il biro en l'abitaziun. Ils Giger's abiteschan en il Titt-hof a Cuira. Ma avant las elecziuns èn las plunas da brevs rasadas ora en l'entira abitaziun. «Lura hai en stiva ed en mintga stanza urden e stgatlas da la pcd», conceda la secretaria che stampa e spedescha tut sezza.

Giun tschaler sa chatta l'archiv. L'um sevilia mintgant, sch'el turnia si da tschaler cun ina butteglia vin e saja puspè bunamain i en venter sur las stgatlas. Ma las reclamaziuns dals dus umens na paran betg d'esser uschè nauschas. Sch'i va sin il peter pis sa gidan omadus cun la mamma. «L'um ed il figl han bleras notgs pachetà brevs cun mai.» Il job è dotà sin 40 pertschient. «Avant las elecziuns lavur jau tschient per tschient», di Patrizia Giger. Temps d'avertura n'enconuscha la secretaria dal reminent betg.



Patricia Giger è 24 uras en il servetsch da la partida.

FOTOS C. CADRUVI

Ils commembers da partida pon telefonar cur ch'els vulan. Giger è adina pronta da dar resposta, da nudar giavischs u da tschertgar dabot in numer da telefon.

Dir a Cuira

Creschida si è Patricia Capeder a Sevgein. Cura ch'ella ha già diesch onns è la famiglia sa chasada a Cuira. Patricia na plidava nagut tudestg. I saja stà dir l'entschatta sco Sursilvana en la chapitala. «Sche ti eras dal 'romansch Kongo' vegnivas ris ora davent da la damaun fin la saira.» Suenter dus onns ha ella pudì ir en il Constantineum, la scola catolica, nua ch'i deva scolaras da tuttas nazions. Là faschevan persunter las mungias «urden». «Nus dastgavan vegnir cun chautschas mo sch'i aveva dà in grond tatsch naiv.» En scola stuevan las «exter-

nas da chautschas» immediat ir a sa stgamiar giun tschaler e trair en rassa. E paupra sche la rassa na curclava betg il schanugl.

«Ti fissan ida tar ils sanesters»

Suenter il «Consti» ha Giger lavurà tar il chantun. L'emprim sco chanzlista tar la polizia d'esters, pli tard tar l'AVS. Cun 28 onns è ella maridada.

La schientscha politica da Giger è sa reghegliada ils onns ch'il dretg da votar per dunnas è vegnì. Da quel temp candidava in sanester per la regenza. «Nus eran ina clica tar l'AVS che steva en per quest candidat», raquinta Giger. Perquai di l'um da Patricia mintgant per spass: «Sch'jau na fiss betg stà, fissan ti ida tar ils socialists.»

Ch'ella haja ina avaina sociala na sne-

ga ella betg. «Nossa partida dovra questa avaina. Uschiglio n'essan nus betg la partida dal center.» La pcd haja fatg in grond svilup ils ultims decennis en quel regard. Tuttina remartga Giger: «Sch'ins è in zichel per il social u per chautschas da femnas, vesa inqualin da noss commembers gia il fazolet cotschen.» Pertutgant tematicas da dunnas è Giger s'engaschada per l'assicuranza da maternità, per l'interruptiun senza chasti e per ina quota da dunnas en la pcd.

Tip administrativ

In temp è Giger stada suppleanta en il cussegl grond, intgins onns ha ella politisà sin palancau politic a Cuira. Las lavurs administrativas plaschan dentant meglier ad ella.

Tuttina èsi la finala stà ina surpraisa ch'ins ha proponì ella sco secretaria. Da quella sesida sa regorda ella bain. La suprastanza tschertgava in nov secretari. I stuva esser insatgì ch'enconuscheva bain ils singuls politichers. Tuttenina haja

Dumeni Columberg ditg: «Daco ir lunsch ad encurir? Nus avain gea qua ina persuna ch'enconuscha tut.» Columberg haja mussà sin ella. «Jau sun bunamain dada giu da la sutga.»

E l'emprima reacziun da ses um a chasa saja stada: «Na, quai fas ti betg.» L'auter di la segunda: «Quai fiss forsia gnanca uschè mal.»

Ina chanastra plaina

Pauc pli tard ha Giger survegnì ina chanastra plain actas. Ils emprims mais ha la secretaria già l'incumbensa dad installar in secretariat modern sco quai ch'i dovra ozildi.

Notgs en e notgs or ha ella ordinà adressas en il computer. Oz cloma ella giu entaifer paucas secundas glistas da las partidas cirquitalas, localas, da presidents, da politichers da l'executiva euv. Gia avant esser secretaria enconuscheva ella ina massa gliud da la pcd. Ed oz – ditg senza malart – enconuscha ella mintga cua.

Curt e bun

Naschida: Ils 5 da december 1945
Creschida si: A Sevgein ed a Cuira
Hobi: Cuschinar, ir ina giada l'emna a Turitg
Lectura: La Quotidiana, las gasettas dal di tudestgas
Emissiuns: Novitads, Televisiun Rumantscha, DRS aktuell, 10 vor 10, «Wer wird Millionär?»
Destinaziuns preferidas da vacanzas: Frantscha, Italia
Siemi: «Ina giada less jau ir en l'America.»

